

DC Chümoukedima, Abhinav Shivam den tepila sentong agi



DPDB Hall, DC Office, Chümoukedima nung July 31, 2024 nü Deputy Commissioner, Chümoukedima, Abhinav Shivam, IAS den tepila sentong agiba mapang tangokba noksa ka nung pa den DC tasenba Polan John, NCS angur.

Dimapur, Chiteni/July 31 (TYO): Chümoukedima indang Deputy Commissioner menden yutsür aosang Abhinav Shivam, IAS nem akum agüja tepila sentong ka July 31, 2024 nü DPDB Hall, DC Office, Chümoukedima nung agia liasü. Deputy Commissioner, Chümoukedima, Abhinav Shivam, IAS ajanga iba sentong nung tepila o jembidang pai mapa nung ajangshibatem lemsatapa liasü.

Pa küm ana ser tasadang Chümoukedima DC inyakba mapang ketdangsür aser staff temi yaritepba ajanga maparen balala nung takok ngua inyakogo, ta ashi.

Ni kechi nungsa takok nguogo, item ajak ya ketdangsür temi amalitep akaba nungi lir aser ni inyakba mapang ketdangsür mesüra staff temi pai ashiba mangai mali aser metokmeperi kar danga lira ibaji

ni meshidakba nungi alitsü, ta DC Shivam-i ashi.

District nung nüburtemi pa dang temeim sayuba atema pai lemsatapa liasü.

Staff temi junga inyakba ajanga dang ketdangsüri takok angur aser department balalai amalitep akaba ajanga maparen balala takok ngua inyakogo, ta ashi.

Kü mapang temogo, saka DC tasenbai iba milen belenzüka bener aotsü, anungji kü den yaritepba ama DC tasenba den yariteptsü ayongzüker, ta pai ashi.

Chümoukedima ya maongka balala aliba district ka lir aser ano teinyaktsü jenti lir, saka ketdangsür aser staff temi shilem tajung agiba ajanga Chümoukedima district aintsü. Administration ya teamwork dang lir, anungji ketdangsür aser staff temi kasa lenmang nung jajatsü ayongzüker, ta Chümoukedima DC tejenbai

ashi. DC tasenba Polan John, NCS ajanga iba sentong nung jembidang, tang mapa yutsüsang ya tetemsü IAS officer ka lir aser pa lenisüba kübok district kanga junga ketdang süogo, ta ashi.

Tanü Chümoukedima kechi jenjang nung ali, iba ya DC tejenba mapa lir. District tasen ka asünungji tebilemsü jenti liasü südi aser mapa tasak liasü südi, saka pai meranga inyakba ajanga district nung terenlok balala angur, ta Polan John-i ashi.

Pai ketdangsür aser staff tem dang tarutsü anogotem nung lungjemer inyaktsü imlar ta ashi.

Administrative officers tenüng nung jembidang, DC tejenba ya shisa taka ketdangsür ka liasü, ta ADC, Medziphema, James Swu-i ashi.

Pa DC ama arudang district nung kecha meliasü, saka pa lenisüba kübok terenlok jenti angur aser maparen balala nung takok lir, ta ashi.

Pa ya lenir tajung ka lir aser Chümoukedima district atema takoksa, saka Naga nunger atemabo takoksa masü, kechiaser pa Nagaland nungsa Naga nunger atema inyaktsü, ta Swu-i ashi.

Iba sentong nung menden SDO(C) & RO Chümoukedima, Thejavizo Nakhro liasü, DBs tenüng nung PA to DC P. Kedokhrielie-i jemi, DC Office staff tenüng nung LDA Kenneth Zalipu-i jemi, HoDs tenüng nung DAO Chümoukedima, Bodevi Shuya-i jemi aser Vibeizono Khro-i temeja ken ka tena liasü.

PHQ ajanga oset kar ayoktsü sangdonger

Dimapur, Chiteni/July 31 (TYO): Computers, Printers, Fax, Monitor, CPU, UPS amala Office Automation indang oset tejen kar August 5, 2024 anüngdang 12:00 ako nungi nikongdang 2:00 ako tsüngta SCRB, PHQ premises, Kohima nung open auction alitsü, ta sangdong ka ajanga

ashi. Auction bid ya nikongdang 2:00 ako tashi alitsü aser sen timba bid asür temi iba tesem nung sen agüja pei sasa osettem bener aotsü. Osettsüset khen ayokba tanaben lepa magitsü aser tanüngba osettsüset rongdoktsü mesüra indoktsü, ta sangdong ajangasa ashi.

Kiphire nung PM-Vishwakarma Scheme sentong ka agi

Dimapur, Chiteni/July 31 (TYO): DPDB Hall, Kiphire nung July 31, 2024 nü PM - Vishwakarma Scheme Launch Program of Skilling Component sentong ka agia liasü.

ta pai ashi. Paise Ato Kilonser-i Kiphire District meimba atema tepela lemsatapa liasü.

Sentong nung Deputy Commissioner aser Chairman, DIC - PM Vishwakarma, Kiphire, Temsuwati Longkumer-i tarur pela agizükba o jembidang Skill development, access to finance, technology adoption, marketing linkages amala indang scheme nung keta aliba rateta ashi.

DC Kiphire, Temsuwati-isa lokti dang training mapang tajungtiba nung adentsü ayongzüka liasü.

Item maparen ajak ya lenla balala nung terenlok atema sentong tasen asateta inyaktsü aser entrepreneurship adokdaksütsü nükjidong nung lir,

Iba sentong nung Joint Director, Employment & Skill Development, Kohima, Alongse Sangtam aser SEC PM-VKS, Pravin Yadav nungeria o tatsütsü jembia liasü.

Iba sülen teyari angur nem PM - VKS ID Cards lema agütsü aser EAC Kiphire, Takatemjen Pongen-i melepzüng o jembia liasü.

Iba sentong nung menden Sukanya ABF, Kiphire liasü.

NBSE-i INSPIRE-MANAK Schema indang metetdaksü

Dimapur, Chiteni/July 31 (TYO): Nagaland Board of School Education (NBSE) ajanga Heads of Institutions ajunga dang sangdong ka nung ashiba agi, INSPIRE-MANAK Scheme ya flagship program ka lir, koba Department of Science and Technology (DST) aser National Innovation Foundation (NIF)-India lungjemer mapa kuma inyaker aser ibai Class 6-10 nung azüngba arishi küm 10-15 tsüngta kaketshir nem yimya tasen ratettsü asoshi shisa agütsütsü nükjidong nung lir.

ideas tajungtiba bendena INSPIRE Award agüja item kaketshirtem indang shisatsü amshia prototype aser product development nung amshitsü nükjidong nung lir.

MANAK Scheme yagi linük tesem balala nung middle aser high school lakh pongu dak tema nung azüngba kaketshir nungi 'original/innovative ideas' million ka dak rangloksü aser loktilibai nüngdakba aser applications atema teimla aliba

Anungji INSPIRE-MANAK Scheme kübok registered school temi küm shia pei school nuni online mode ajanga E Management of INSPIRE-MANAK Scheme (E-MIAS) web portal (www.inspireawards-dst.gov.in) nung ideas tajungtiba pongu shimettsü.

2024-25 atema online nominations ya July 1, 2024 nü tenzükogo aser school temi September 15, 2024 tashi online nominations agütsütettsü. Anungji register süa aliba school temi nüngdakba mera agitsü ayongzüker, ta sangdong ajanga ashi.

Kohima nung matamabensar atema distribution camp ayongzüker



Dimapur, Chiteni/July 31 (TYO): District Level Committee on Disability ajanga Artificial Limbs Manufacturing Corporation of India (ALIMCO) den lungjemer Assistance to Disabled Persons for Purchase/Fitting of Aids and Appliances (ADIP) Scheme kübok Municipal Council Office Complex, Kohima nung matamabensar (Divyangjan) atema distribution camp ka Hombarnü ayongzüka liasü.

Deputy Commissioner, Kohima, Kumar Ramnikant, IAS-i iba sentong nung jembidang nübur ajunga nem maongka kasa agütsütsü tongtipang lir ta ashi.

camp ya tilaka dang süaka 'inclusive society' kumdaksütsü asoshi tongtipang mera ka lir, anungji nüburtemi matamabensari nüngdakba tali tajungba nung meteta alitsüla, ta pai ayongzüker.

Iba sentong nung State Commissioner for Persons with Disabilities, Diethono Nakhro-i Kohima nung disability sector yaria assessment aser distribution camp ya kanga tongtipang lir, ta ashi.

Matamabensar aliba kibong temi timtem balala ajurur aser teyari talila nüngdaker, ta lai ashi.

Matamabensar den mebensai alitsü atema

tentet, tetsür telok temi yaria matamabensar litettsüsa yangertsüla, ta lai ashi.

Matamabensai aliba tanurtem nüburtem den metettepa shilem balala agitsü atema school, classroom aser asayadak moabo parnoki amshitetsüa yanglutsütsü tongtipang lir, ta Nakhro-i ashi.

Assestive aids aser oset nung sen asakba ajanga aiben matamabensartem kecha nunga shilem magir. Item oset ya hadir ka dang masü saka sempet aser tejangraba adokdaksür lir, ta lai ashi.

Iba sentong nung Moasunep K. Jingru, EAC (Development) menden liasü, Vikengungu

Fazl Ali College nung Ao... (Tapak 1 nungi...)

Iba sentong nung Tsüngrem temoatsü jazüka ABAM Executive Secretary Rev.Dr.Prof.Mar Pongener-i sarasadema tenzüker aser Ao Riju Executive Member Wb.Limawati Longchar ajanga tarur pelaa agizüka jemi aser tatem nung Ao Riju Tongti Zülur ajanga tepela o jembiba den Dept. of Linguistic,NU aser head of Language Division Ao Riju Prof.Pangersenla Walling ketdangsüba sentong ania liasü.

Myanmar ama nung mesüktepa jembirta ashi.

Dr.Blench-isa Naga nunger oshiji tang putu nung tera renloka oaka tezüluba kecha rizünga makaba ajanga Naga nunger oshiji tang tashi nung sensak tia nung dang lirta metetdaksü.


Dr.Blench ajanga iba onük nung ajemdaker jembidang Naga nunger oshiji alima tesem talisa India,Bangladesh aser

Naga nunger oshi tangar oshi den koma sentaktepa lir aser ano Naga nunger tetsüngda nunga kin balala süaka oshiji koma benteta lir item teratem bushitetsüla, iba den Naga nunger oshioben renloka aotsü asoshi oshi tera bushitetsü kanga dang nungtakerta Dr.Blench-isa lemsatap.

Tanu iba sentong nung Ao Senden, Watsü Mungdang aser Ao Kaketshir Mungdang nungi adenba den Ao oshi meimer nübu aika dena iba sentong kanga dang meraket keta tajangzüker ngua agi.

MULUNGNEŊ O

“ Akhi ama auyiji aliisa meyiper aser tanelajibo tagütsüsang Tsüngrem dangisa shilanger ”
- Sayutsüngir 12:7



June 01, 1930 - July 28, 2024.

Ozü temeim obala ALIENBA JAMIR (Asangma) temang manemi alidang aser pa iba lima nungi pilar onok mangyim jashi nung aliba mapang kija-kibong, arogo, lokti aser yimten nungi shirnokisa onok dang meima nebo, sarasadem aser rongsen agi yariogo, nenok ajak dang onok kinungertemi kanga pelaba metetdaksür. Onok timtem aser nüngdakba mapang nung nenoki onok dang yariba temeim mapatem onoki teti bilemtetsü. Onoki nenok kija shia tenüngteta pelaba meshitetba atema kanga sasar, ajisüaka Tulusang Tsüngremi nenok temeim mapatem asoshi talubosa moajangma ta onoki sarasademtsür.

Talisa onoki item dang ya pelaba shisemer :

- | | |
|--|---|
| 1. Shri.Narendra Modi, Hon'ble Prime Minister of India. | 27. Reongsanger Putu Menden, Kangtsung |
| 2. Shri. Neiphu Rio, Hon'ble Chief Minister, Nagaland | 28. Kangtsung Baptist Church |
| 3. Shri. Sharingain Longkumer, Hon'ble Speaker, NLA. | 29. Kangtsung Senso Mungdang |
| 4. Hon'ble Ministers & Legislators, Nagaland | 30. Kohima & Dimapur Kangtsung Senso Telongjem |
| 5. Officers & Staff of Fisheries and Aquatic Resources, Nagaland Civil Secretariat, Kohima | 31. Mejensanger Putu Menden, Wameken |
| 6. Officers & Staff of Directorate, Fisheries and Aquatic Resources, Nagaland, Kohima | 32. Wameken Senso Telongjem Kohima & Tzudikong |
| 7. Officers & Staff of District Fishery Office, Mokokchung. | 33. Tzudikong Adhoc Town Committee & Wards |
| 8. Officers & Staff of Land Resource Department, Mokokchung | 34. Wameken Yimsen Village Council |
| 9. Officers & Staff of ADC Office, Tuli | 35. Tuli Town Councilors and Wards |
| 10. Ao Senden | 36. Tuli Area Join Council Forum |
| 11. Ao Students' Conference (AKM) | 37. Tuli Area GBs' Union |
| 12. Langpangkong Tzukung Mungdang (LTM) | 38. Tuli Area IEF |
| 13. Langpangkong Students' Conference (LKM) | 39. Merangkong Medemsanger Putu |
| 14. Mokokchung District Dobashi | 40. Merangkong Senso Telongjem, Tuli |
| 15. BJP Nagaland | 41. Mopungchuket Senso Telongjem, Tuli |
| 16. BJP Mokokchung District | 42. Merangkong Litsu Small Tea Growers' Union, Tuli |
| 17. BJP Mangkolemba Org. | 43. Aopenzu Village Council |
| 18. BJP 21 Tuli Madal & Units | 44. Luyong Village Council |
| 19. Asangma Village Council | 45. Luyong Baptist Church |
| 20. Asangma Baptist Church | 46. Molungyimsen Senso Telongjem, Tuli |
| 21. Asangma Students' Union (AST) | 47. Kelingmen Senso Mungdang |
| 22. Asangma Senso Telongjem, Kohima, Medziphema, Dimapur, Tzudikong, Tuli, Mokokchung | 48. Kelingmen Reongsanger Putu Menden |
| 23. Anaki Yimsen Medemsanger Putu Menden | 49. Kelingmen Students' Union |
| 24. Anaki (C) Village Council | 50. Kelingmen Senso Union, Tuli |
| 25. Kangtsung Yimsen Village Council | 51. Kelingmen Uniontsür, Tuli |
| 26. Anaki (Old) Village Council | 52. Aosenden Village Council |
| | 53. Aosenden Baptist Church |
| | 54. Ao Senso Telongjem Darogapathar, Dimapur |
| | 55. Town Sub-Centre Staff, Salangtem, Mkg. |
| | 56. Kichutip Fellowship Mokokchung (MTBA) |
| | 57. Ongshi Kidong. |

~ Temeim Kinungtsü, Chirnur, Semchir, Puiner, Anükapang & Kinungertem

Opposition MP temi train lendong atema tebilemtsü lemsatep

New Delhi, July 31 (Agencies): Bodhbarnü Lok Sabha nung opposition MP temi linük nung train lendong kanga bulua atalokba atema tebilemtsü onük lemsatep aser ruling MP temi railway network ulushitsü atema inyakba asoshi sorkar nem tenüngsang agütsü.

Railway ministry indang Demand for Grants atema jembidang opposition MP tem aikati peipei tesem nung railway lines tasen amenoktsü atema takhangba agütsü.

Aurangabad nungi RJD MP, Abhay Kumar Sinha-i, tawa train lendong aika atalokba ajanga railways inyakim nung tashimait aliba temaitsü sayur, ta ashi.

Sinha-i, “Linük nüchiso anguba mapang nungi tenzüka railway lenmang tasen shilem 18 dang amenokogo aser küm shia kilometer 275 dang ulushir. Train lendong nokdangtsü atema iba ya teimba kümtsütsüla, railway lenmang tasen aika yanglutsüla aser lenmang tejen yanglushitsüla,” ta metetdaksü.

Sinha-isa, “Lalu Prasad railways minister inyakba mapang nung Indian Railways-i sen aika aazüka liasü aser ibaji

alimaia jembia liasü. Tanübo train para atur saka railway bo tang tashi timtemer. Sorkari Indian Railways ya nija nem agütsütsü meranger,” ta aitsü. Paisa, railways ya nija nem agütsüra mapa manguba tebilemtsü ya tuluba dang akümtsü, ta ashi.

RSP MP, N K Premachandran-i train passenger tem lendong nungi kümzüksüji sorkar teinyaktsü mapa lir, ta ashiba den külemi railway atema lemszüksüba budget jagi meperitsü, ta ashi.

Congress MP, Harish Meena-i railway budget aitsüba den külemi pai, “Train lendong atema shingaiia süoki ia mebilemer. Iba ya yimtenren budget ka lir. Ozü constituency atemabo train melemszüksü mesüra teyari-a magütsür,” ta ashi.

Samajwadi Party nungi MP, Sanatan Pandey-i, “Vande Bharat ama high-speed train atema kanga jembir saka Ghazipur aser Ballia nungbo train ji tang tashi ghonda ka nung kilometer 30 tashi dang kera jajar. Train lendong kanga ataloker, aser yamai dang süra kobi melii nisungtemi train nung senzüba anentsü,” ta ashi.

Wayanad anentsüh lendong nung asür 167 jungogo



Wayanad, July 31 (Agencies): Kerala state kübok Wayanad district nung anentsüh lendong nung asürtem senteper 167 jungogo aser maneni asürtem iba dang nungjagi teimba akümtsüa akok.

Bodhbarnüa Wayanad administration-i, tasü mang 42 bo post-mortem agiogo, ta metetdaksü.

District administration-isa, tasü mang 86 bo maitsü jangjaogo aser iba nungjagi tasü mang 75 kinungertem ket nung agütsüogo, ta metetdaksü.

Ano külen tanga osang ka nung, Bodhbarnü Union Home Minister Amit Shah-i, Centre sorkari jelia Kerala sorkar nem tekümdangtsü osang metetdaksür liasü, ajisüaka Kerala sorkari ibaji sendoka toktsü, ta aitsüogo.

Iba dak sendakba nung Kerala Chief Minister, Pinarayi Vijayan-i, tang mapang ya tai tongloksütepba mapang ka masü, ta metetdaksü.

Bodhbarnü Rajya Sabha senden nung Home Minister Amit Shah-i, July 23-24 anogotem nung Kerala nung lendong ataloktsüa akok ta state sorkar nem metetdaksür liasü, aser sorkari ibaji süoki ia agi asübo iba lendong nung takoksa

tulubo mengula, ta ashi. Amit Shah-isa, July 23 nü National Disaster Response Force (NDRF) team 9 Kerala dangi jelia yoka liasü aser July 30 nüa team asem yokogo, ta metetdaksü.

Amit Shah-i Kerala state sorkar aitsüba sülen Chief Minister Pinarayi Vijayan-i, anentsüh lendong ataloktsü jelia ‘red alerts’ maliasü, ta metetdaksü.

Wayanad district kübok anentsüh lendong jagi yimtsüng tila ishika- Mundakkai, Chooralmala, Attamala aser Noolpuzha kanga mejungi kongshi. Mongolbar anepdang züngia anentsüh lendong tulu ataloka nisung aika süogo aser aika lishi/jana agi rembanger tang tashi menguteter.

Wayanad district nung nütsüng 8,17,000 shi lir. Iba district kübok Mundakkai yimbo meshimeshia samaogo.

Osangbenertem den jembidang tebur kati, “Mundakkai bo Wayanad ‘map’ nungi meshimeshia samaogo. Yangji joko kecha mali. Yangji lishi aser long dang anünga lir. Lishi temeim nung jajatsü-a makoker, anungji koma ser onoki kinungertem lishi telung nung bushitetsü,” ta ashi.

केनरा बैंक Canara Bank
साधारण बचत बैंक

SALE NOTICE

DIMAPUR BRANCH
1 Floor, Latika Complex, Nyamo Lotha Road (Church Road), Dimapur, Nagaland, PIN- 797112, Contact: 9716900184

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 nung Rules 8(6) nung ajemdaker kiojen ayoktsü atema E-auction Sale Notice agütsür.

Public aser talisa sen apur(tem) aser Guarantor(tem) dang, tsünglanglen shia aliba kiojen, koba Secured Creditor dang mortgaged/ charged süa liasü, iba kiojenji Canara Bank indang Authorised Officer-i agiadokogo aser iba kiojenji sen apur aser Guarantor dang nungi sentstüh alangzüksü asoshi **25.09.2024** anogo nung “Kong aliar yamaji” aser “Yangji aliba ajak” ayoktsü.

Earnest Money Deposit (EMD) ji **24.09.2024** nü nikongdang 4:00 ako tashi nung deposit asütsü.

Auction ji website: www.bankeauctionwizard.com ajanga “Online E-auctioning” asütsü.

Auction anogo aser mapangji: 25.09.2024 anogo nung anepdang 11:00 ako nungi nikongdang 01:00 ako tashi.
(Aser sale metembang tashi mapang shia minute pongungu (5) atsilangtsü).

Branch, sen apur/guarantor, liability, kiojen aser EMD tajangja, reserve price:

Sl. No.	(A) Name & Address of Secured Creditor/ Branch (B) Name of Borrower/ Guarantor	Brief Description of Immovable Property	(A) Total Liabilities (Rs.): (B) Reserve Price (Rs.): (C) EMD (Rs.): (D) Increment Amount (Rs.):
1.	(A) Canara Bank, Dimapur Branch, 1 Floor, Latika Complex, Nyamo Lotha Road (Church Road), Dimapur, Nagaland, PIN- 797112, Contact: 9716900184 (B) Borrower / Guarantor: M/s. Tizu Trade Agency Proprietor:- Kavito V Yephthomi (Guarantors) Kiyekhu I Sema	EMT of Land standing in the name of Sri Kavito V Yephthomi covered by Patta No. 430, Dag No. 142/505, Mouza No. 03 situated at Village: Dubagaon Village, Near Ekran Pathar, Dist. Dimapur, (Nagaland) land measuring 1Bigha- 2Katha- 13Lechas. Boundaries (As per Sale Deed): North: Land of Zakheto, South: Land of Merin, East: Land of Bihephu, West: Land of Shinine.	(A) Total Liab.: 65,25,240.68 + further interest & cost. (B) Reserve price: 46.00 lakh (C) EMD: 4.6 lakh (D) Increment Amount: 20,000/-

Iba sale atema telatetbatem tejangja Canara Bank indang website (www.canarabank.com) link “E-Auction” nung angütsü mesüra mapa inyakba anogo mashie ka nung office mapang Manager of Dimapur Branch den Contact No. 9716900184 ajanga tongteprateptsü akok.

Date: 26.07.2024, Place: Dimapur Authorized Officer, CANARA BANK



TIR YIMYIM

YIMOBILEM (EDITORIAL)

DIMAPUR YANGTEPNÜ, AUGUST (LUROI) 01, 2024

Asen Oshi Mulungzüng Sobaliru

Ao Riju aser Fazl Ali College nung Language Translation Center na longjemer Ao oshi renlokdahtsütsü nükjidong nung ayongzükbä ali kintem mungdang nung Aor oshi, kenozülu (literature) aser mulungzüng sobaliru (oral tradition) indang shisalemsatepba ya mapang shitak ka nung nisung shitak purtemi asen kin kanga nungdakba asentenshi sentong ka ayongogo ta bilemer. Asen oshi ya kanga takar, kechiyong mapa ajak nung asen oshi lir aser ken ka, o ka ta asüba oshiji asen oshi lir. Iba ama takar oshijibo alima nung tangar kin oshibo malitsü südi. Aji oda, oshi yabo zülua yur mejembir saka alima kintem oshi ajak mulungzüng agidang jembir, anungji oshiji mulungzüng agi angazüktsübaji kanga tongtibang akümer. Itemji sozükli nungi tsüraburi pei chirnurtem dang pei tetsü oshi jembir sayuba nungi tenzüktsü. Atangji, asenokbo oshi dang masü saka yimten temzüng ozüng, lokti sobalibaren, mapa inyakyim, lipok aser puti otsü, tar nunger aser asürmetenla otsütem ajak mulungzüng agidang sayu aser mulungzüng agidang angazüktepa aru, iba jagi ibaibo sobaliba masü saka mulungzüng sobaliru ta petpeta jatetogo. Iba mulungzüng sobaliru ya, talisa, asenok meyong zulu makaba agi mesüra memetetba agi kakat küma zulu nung meyutet, oboula nungertemi parnok mulung nung dang lipoklisang, temzüng ozüng, otsü aser ken tapu ajak rezünga ayu aser itemji parnok obala nungertem dang ashi aser obala nungertemi asenok dang ashi ta oboula, obala aser asen aliba tanü putu ta melentepa arudang mulungzüng sobaliru agidang asenok putusa putu anir aruogo. Aji oda, iba mulungzüng sobaliruji tanü tashi mesamadaktsüi asenok yimten tsüzüng ozüng, senlem aser okadak amshia arur. Atangji, tanü putubo muluzüng agidang ken o jembiba aser nisunger nungdaktem inyaktepba putu masü saka zülubanglu amshia jembitepba aser inyaktepba putu tasen ka nung asenoka talangka liadokogo. Iba jagi aiben parnok kechi ashi ta masü saka kechi koma zülua lir asüngdangtepa inyakteper. Ajisüaka, tanü putu zülubanglu amshiba putu nung asenoki bilemdangtsüba kaji, mulungzüng o aser ken sayuba aser angazükba ya oshi aser otsü angazüker dang masü saka iba yagi kibong nungi tenzükter lokti aser yimten tesendaktep aser tangatettep nung yutsür. Mulungzüng sobaliru ajanga oboulai, otsülai, obalai mesüra ojalai pei chirnur aser lanurtem dang tebang agi ashiba sobaliru jagi tsürabur o chirnur na , tain o tanur na aser tantsür - tambur o lanurtem na külemi mener otsü atongtsüsa senti mapang aser maongka ka agütsür. Iba jagi tanurtemi pei tsürabur kidang mesüra yipten nung mulungzüng agi angazükba otsü aser sobalibarenji mamai pei tsürabur bilemteta benshir. Kasaji, yimten nunga tebu tedi aser ait nung alir yimsüsürtem nungi lanurtemi tarutsü nung par mapang benshia aotsü lipoklisang, putipuyang, sobaliba, likalilem aser otsü olem angazüktsü meranger. Mulungzüng sobaliru yabo kanga kümdanga aser apayua amshia aotsüba senmang ka lir, kechiyong lipoklisang , otsü olem aser ken o meteter tsüraburtemji süadokra, pei oshi aser pei ken o aser otsü ajak remadoktsütsüsa akümstsü. Anungji, lanurtemi taintem dang nungi pei lipok otsü, sobalibaren aser ken o angazüktsü jangratsüla aser taintemia shisameramai mulungzünga alidang, pei mulung nung rezünga aliba ken süli, o süli itemji mekurui lanurtem nem angazükdahtsütsüla. Atangji, item mulungzüng sobaliru ajakji taküm lidakja benshia aotsübaji pei tetsü oshi asütsüla. Tangar oshiji temeteter aser takar oshi asütsüa akok saka iba oshi nung asenok ken aser asenok o senmang küma amshia moutettsü. Aji oda, Fazl Ali College ama kaketrejutem nungi pei kibong tashi nung tsürabur aser tesayurtemi pei tanurtem den pei tetsü oshi jembir tenzüktsü asoshi asentenshiba mapangji tang ya lir. Ibai kanga junger !

OLEMSABANG

TSÜNGREM MONG

- I. Shilu Jamir, Dimapur.

Aoer benjongmong tulutiba "Tsüngrem mong" tanü putu lanurtem asoshi-a tongtipang ta bilema ajangshiba aser angazükba tongmelang ratet tatsüka lemsateper.

1. Longtrok nung poker Chungliyimti lima aliba putu tensa süng lanu, long lanu, shiruru nisung, Tsüngrem kecha tebandang mali meimchirtem-a shiruru yimya mesüka pei sasep litepba putu mapang aji oda tesüngmangtsu ka lia aruba otsü-i ashir.
2. Iba tensa yimti nung tainer ana Tsüngremsang aser Merangsang na ajurutepba metetteba tena tembar tajung aküm. Yamaji iba yimya benshia mezüng ajurutep dang junga metetpela yimya tajung Aoer-i benshir ta jembir.
3. Iba putu mapang Aoer nübur ajunga sobaliba loktiliba kecha maka oda mapa ajunga agi alu yima inyaka chia jema alitsuba ji dang liasu. Tena tembar yimteper küm na buba tena arr süa alu ayim.
4. Tsüngremsang dang pongmang nung teyar-i ashi "Nai alu inyakmaa mapa temer kelen anogo terok anempong among mongjang, ni nai inyakba ajak nung moatsütsü" ta ashiba tashi angaa pai terok nü anempong among. Alu meinyakma ayi sakzüka alu wadang temtaka yur hapta piyong par shinga alui maru yimer ajak süngmangteba liasu. Par alu meinyakma yongbo alu arudangbo par tajungba. Longkitsüngba tiyar-i moaja, tsük tangar ajak dang par tajungba aser teinba ruden.
5. Tanabuba küm Merangsangjia pa tembar Tsüngremsang nungi angazüka among aser tenaprongla alu nung tsünütsü o tsük ajak junga züsentetba nunga oli aruli ta talubu benden. Joko Merangsangi Tsungrem mong teti monga tenzük nung pa ajanga Tsungrem mong ya tenzük ta otsü lir.
6. Ajisaka Merangsang yakta yim toktsür Sangpuyim nung alitsu aotsüsa aküm nung Chungliyimti nunger iba tsungrem mongji memongtet.
7. Merangsangi Chungliyimti toktsür par adianu den Sangpuyim nung oa alidang pai par yimer dang Tsüngrem Mong amongtsü ashi. Yimeri memulong aser mamong.
8. Par nüburi memulongi mamong yongbo pa kümji Merangsang aser par kibongibo terok nü anemponga among. Alemliba putu mapang shiruru yimya ama kiyong kidanger tsungda-a hai-hau mesütepi litepa aruba putu, anü adoker alu-a memetet pei alu wadang renemtsu dang aritepa tasen lumongba mapang, par alubo ayi sakzüka alu wadang temdaka yur par anemponga mongtop, tesüang oa aluji inyakmaa, saka tsük aser tsünütsü par tajungba adok, aser kanga tsüksüng onsünga nunga oli aruli ta ruden aser yimer ajak kanga süngmangtepesa jembitep.
9. Merangsang künü arr ateni ao dang Tsüngrem telok ka arr atsütepya longso tepba ajuru "Nenok kechisür" ta pai asüngdang nung "Onok arr atsütepa longso tepa pelatepba Tsüngrem Mong amonger" ta langzü. Iba jiloji ajizüka Tsüngrem Mong nung shizüng zü ateni oa bener adoker yimer ajak longso tepba pelateba arr atsütepa benjonger ta otsü lir.
10. Iba sülen Sangpu yimer Longsa limai arua lia Tsüngrem Mong junga amongba ajanga yimchi yimjung süa ali. Alemliba Longsa Mong ta jar anogo terok nü jisa among ta jembir.
11. Alemliba mapangbo pei pei mongbo mapang apirsa terok nü monga arua liasü. Kodang Dr. Clark ajanga Yisu yimsü bener arua sayua nüji kümdaktsü, iba sülen Mongdang, Arogo, Kaketshir, Yimden longjemer 1944 küm Longjang yimti Ao Kaketshir Mongdang nung anogo asem nü dang amongtsü longjema renemted. Yamaji, August 1-3 asenok-i Tsüngrem Mong monga arur.
12. Tsungrem Mong amongba mongpoji tsürabur temi alu laumokbi mapatem tema arudang süngben liben apongba mapang takzür kiolu mapa tempanger joko alu nung tejang tajung tangjang aser kanga moajang ni ta külema amongba anogomong lir. Tongtipangsa süngsa/süngsaben apongba mapang agi tet-züa among.
13. Among anogotem:-
 - a. Süngben Mong.
 - b. Zünga Yongya Mong.
 - c. Yati Mong.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

AVBM agi Assam Valley Baptist Association (AVBA) kumogo



Nakachari, July 31, 2024: Bodhbarnü Nakachari nung Assam Valley Baptist Mission (AVBM) 19buba Foundation Day anogomong sentong nung adener kar tangokba noksa nung angur.

Nakachari, July 31 (TYO): Day anogomong sentongji 2005 kum tentetba Assam Valley Baptist Mission (AVBM) agi kasa nungja nung Association inoksema "Assam Valley Baptist Association (AVBA)" kumogo.

July 31, 2024 nü AVBM 19buba Foundation Day anogomong nung Association kumogo.

AVBM indang Foundation

Nakachari HQ nung agi aser AVBA Tiri official süa AVBM ya 'full fledged' Baptist Churches Association kumogo, ta sangdong.

Iba sentong nung Kumlong Baptist Arogo nung Associate Pastor Women, Kr. Rachel Jamir-i "With God everything is possible" omen nung ajemdaker Tsüngrem O jembia aser

Kumlong Baptist Arogo nungisa pastor Kikum Longkumer-i tayongzükba o jembia aser deacon, Chubatoshi-ia o tatsüka jembia liasü.

Iba sentong ya AVBA Youth Counselor, Aamong Phukan leniba nung agi aser AVBA Evangelist, Huni Gogoi-i lokti pelaa agizükba o jembia liasü.

Iba sentong nung Arogo 32 nungi tejaoker 207 aden.

Uttar Pradesh nung anti-conversion ozüng ano tesashiba benoktsü

July 31, 2024: India nung nütsüng teimtiba aliba state-Uttar Pradesh nung anti-conversion ozüng yanglushia ano ozüng tesashiba benoktsü atema inyaksangshidar.

July 29, 2024 nü Uttar Pradesh state sorkari parnok indang anti-conversion ozüngtem yanglushitsü atema benokogo; item rongnung bail dak sendakba telatetba tesashiba akümtsü aser ozüng alema yimsü meyipba/ meyipdaksüba nung aibelenertem tajemba agia kum 10 nung tenzuka taküm piyong tepuokdak ayutsü densema lir.

Uttar Pradesh nung Chief Minister aser Hindu putir Yogi Adityanath-i, tamangba yimsü meyipba tebilemtsü onük bentettsü atema Uttar Pradesh Prohibition of Unlawful Conversion of Religion ozüng ya yanglushitsüsa akümer, ta ashi.

Ozüng tasenbaji agizükra anti conversion ozüng alema inyakerkem 20 tashi tepuokdak ayutsü akok mesüra taküm piyong tepuokdak ayutsü akok.

Kasa ozüng kübok, tashiyim amshia, mesüzüka mesüra ashikülak ajanga tamangba yimsü meyipdaksüba nokdang aser Khristan missionary tem mapa ajakji tashiyim ajanga mesüra yimsü meyipdaksütsü atema mesüzükba ama züngshitsü.

Ano iba ozüng kübok ken o

benokba dak sendakba nung, iba ozüng kübok aibelenba atema nisung mashie kati police mesüra ketdangsertem nem osang metetdaksütsü akok.

Ano khen nung nisung aika tamangba yimsü meyipdaksüba ken o nung aibelenertem kum 7 nungi kum 14 tashi tepuokdak ayutsü akok. Ozüng tejenba kübok kum 3 nungi 10 tashi dang tepuokdak ayutsü lateta liasü.

Ano iba ozüng kübok aibelenertem dang senchi 50,000 tashi achitsü lateta lir saka ozüng tasenba kübok sen 100,000 (lakh 1) tashi senchi achitsü.

UP nung anti conversion ozüng kübok ken o ana nung tai tonglokja alisang Khristan putir, Vineet Vincent Pereira-i, iba ozüng yanglushitsü benokba ya nisung mashie ka nem Khristantem anema inyadaksütsü atema lir, ta aitsü.

July 30 nü osangbener den jembidang Pereira-i, "Tang benokdanga aliba ozüng tasenba kübokji Khristantem tesem kecha nunga kumzuka mali, pa/lar kidang, lokti aliba tesem, schools mesüra Tenla kidang-a kumzuka mali, kechiyong ozüng tasenba kübokji nisung mashie kati tiyazü nung ken o benoktettsü," ta metetdaksü.

Varanasi diocese nungi putirisa, "Raratep mesüra mangatettep adokba nung

ajemdaker nisung mashie kati Khristan ka jail nung puoktettsü, kechiyong nisung mashie kati ken o benoktettsü atema sorkari ajak nem temeden agüsür," ta ashi.

New Delhi nung alir Khristan lenir, A.C Michael-i, "Tang yanglushia benokdanga ozüngtemji legal tsütsü tim masü aser constitutional courts nung magizüktsü," ta ashi.

Bangalore nung Archbishop, Peter Machado densema Khristan lenirtemi Supreme Court dang, anti-conversion ozüng aser India nung Khristantem kanga bulua amakba na tesendaktep lir, ta shia Supreme Court dang anti conversion ozüngtem agentsü mepishia lir.

Nütsüng million 200 dak tema aliba Uttar Pradesh state nung Khristan nütsüngbo shilem 1 dang nungia ishiba lir. Iba state nung nütsüng shilem 80 dak temabo Hindu nungertem lir.

Taküm Lok Sabha election nung Uttar Pradesh nung Lok Sabha menden 80 nungi BJP-i menden 37 nung dang takok nguteta liasü.

Tang India kübok state 11 nung anti-conversion ozüng benoka lir aser iba ozüng anema Supreme Court nung ken o benoka lir saka state sorkartem item ama ozüng benokbaji SC-i tang tashi nungbo menokdang.

ANO GO ABEN TSÜNGREM DEN

Nü sentong koda ?

"Kari pa shisatsü metetba aser tekülak amajok agi, aser nisung tar nunger otsü aser alima shisatsü tetenzük Otem, koba Khrista amato masü, item yagi nenok alar kuma ania moudaktsütsü kumdangang" (Kol. 2:8)

Na Tsüngrem den telungjem nung lia pa nükjidong atalokdaksütsü asoshi yanglu, saka nü shi temang tsükchir lima nung taküm aser tanela nung tasü aso (Ef. 2: 1,2). Na Khrista dangi maru aliba mapang item ajak na meketa aliba nungi aru. Anogo shia na iba mopung nung alir aser iba den hai-aura akar.

Nai azüngba kaket ajanga na atsür, nai reprangba noksa ajanga na puwar, nai angaba ken ajanga na ajungmesor aser tesüngmangtsü tatalokba nai ajurur mesüra angur, gari lendong mesüra kibong nung tasüba ataloker. Nai item timtem lendong ajurudang (Tsüngremi mulungba mesüra memulungba) lenmang ka angazüker aser iba nung temulung süa alitsü lemteter.

Na Tsüngrem nungi pilar inra, Tsüngrem medeni ajak nungji temulung süa alitsü nai merangtsü. Kodang na Khristan aküm, ne menen ajak shidoktsü, saka temulung süa alitsü lemtetba ne mulung nung odang alitsü. Na tanaben asoba taküm asütsü aser nai Tsüngrem memetetba mapang kechi taküm yimya (life-style) alitsü lemtet, iba yimya nung maneni alitsüa akok. Iba jagi Paul-i "Nenok temulung tasen akümba agi melenshidakjang" ta zülü (Rom 12:2) Kibuba, kü jakla anogo shia melenshitsü yariang.

Paris Olympics ayongzükertemi Khristantem dang tatok meshi



July 31, 2024: Taoba yirutsüogo, ta metetdakja liasü. Hokolbar aonung Paris UK nunga Evangelical Olympics tetenzük sentong Alliance CEO, Gavin Calver-i, nung alima tesem ajaklen Olympics tetenzük sentong nung Last Supper saya ajanga yirutsütsüsa shilem ka agiba yimjak nung Khristantem mezüngmeshiba ya taoksatsüka lir, ta aija liasü.

UK aser US naprongla nungi nung Khristan lenirtem aikati Olympics ayongzükertem dang tatok meshitsüla, ta takhangba agüja liasü.

Alima tesem balala nungi Khristantem aitsüba mapang ka nung Paris Olympics otongdar, Anne Descamps-i osangbenertem dang, "Yimsü telok kar mezüngmeshitsü nükjidong nung kecha meinyak. Nisungtem jashidaksütsüsa inyaka lira onoki atangji tatok meshir," ta metetdaksü.

Tetsür ama sübuba teburtem aser lesbian activist temi shilem ka agibaji Da Vinci-i yangluba Last Supper noksa ama aika reprangateta ashishir. Last Supper noksaji Yisu Khrista tatembangbuba Pa nütsüngtem den chiyungba noksa lir.

French Catholic putirtemia, Olympics tetenzük sentong nung agiba shilem kar ajanga alima tesem ajaklen Khristantem melung

AO OSHI ANGAZÜKDAK:

TANÜ ANGAZÜKTSÜBA OJANG



Takümren

(n) alima nung taküm rashia aoba ajak (biological, all living creatures)

* Alima nung takümren shia ya kati ka dak metaloktepa alir.

Takümsangnu

(n) shiruru tilatiri tapu ajak dang ajaba (insects)

* Asenoki takümsangnu ya ajakbo metepsettsüla.

OLONG PAITEP # 6862

Grid for crossword puzzle #6862 with numbers 1-16 indicating starting positions.

TIPLIN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___ adenshi - (4)
14. Tsünüsenbongsü adokdak - (3)

OLONG PAITEP # 6861 TELANGZÜBA

TIPLIN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Sükak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



Italy nung tesayur aser astrophotographer Marcella Giulia Pace-i küm 10 tashi nung ita indang sentsü tapu balala 48 tashi tangok. Pace-i full moon asü dang noksatem tangoka aru aser lai küm 10 nung tangokba noksatem ka kümer sayua liasü. Marcella Pace ya primary school tesayur ka lir aser lai astronomy kanga jangraba agi astrophotography wadang nung ajemok. Lai tangokba noksa ya NASA-i 2020 Astronomy Photo of the Day shimteta liasü aser Astronomy Photographer of the Year Awards nunga züngsemogo.

Acharya-i Manipur Governor inyaktsü tezüngzüktep agiogo



Imphal, July 31, 2024 (Agencies): Bodbarnü Raj Bhavan, Imphal nung Lakshman Prasad Acharya-i Manipur Governor (additional charge) inyaktsü tezüngzüktep agiogo.

President Droupadi Murmu-i tawa tu Acharya ya Assam aser Manipur Governor inyaktsü shima liasü. Mongulbarnü pai Assam Governor inyaktsü tezüngzüktep agia liasü.

Arishi küm 59 tain Acharya-i Manipur nung Anusuiya Uikey melenzüker. Acharya ya Manipur nung Governor 19 buba lir.

Manipur High Court nung Chief Justice Justice Siddharth Mridul-i Governor Acharya nem tezüngzüktep agidaksü. Acharya-i Sikkim Governor inyaka liasü.

Pa ya taoba Rashtriya Swayamsevak Sangh (RSS)

aser Bharatiya Janata Party (BJP) züngsem ka lir.

Iba sentong nung Chief Minister N Biren Singh, Manipur legislative assembly speaker Thokchom Satyabrata Singh, council of ministers, chief secretary aser tonti ketdangsürtem aden.

"Ni Manipur Governor Lakshman Prasad Acharya pelashishia agizüker. Nü lenisüba tajung aser aika ajngashia aruba ajanga ozü state nem teimla tasen bentsür arutsü moatsür" ta N. Biren Singh-i ashi.

Mongulbarnü Manipur CM Biren-i Raj Bhawan nung Anusuiya Uikey atema see-off programme nung aden.

"Manipur state sorkar aser nübortem tenüng nung nü dang kanga pelaba metetdaksür. Nai Manipur Governor ama inyadkang len aniba aser bendanga agüja inyakba atema kanga pelar" ta Biren-i Anusuiya Uikey dang ashi.

Assam nungi Sabroom tashi double rail track yanglutsü akhanger

Agartala, July 31, 2024 (Agencies): Tripura Transport Minister Sushanta Chowdhury-i Union Railway Minister Ashwini Vaishnaw dang double line rail track yanglutsü shia Bodbarnü shidi ka züluogo.

Lumding (Assam) nungi Sabroom, Tripura tashi single-line rail track aliba double line yangluang ta Sushanta Chowdhury-i ashi.

"Lumding nungi Sabroom tashi single line track lir aser iba ajanga express o local trains mapang shitak nung mesenzüteter. Iba ajanga train

tasentem mesenzüteter mesüra services tasen metenzüteter" ta pai ashi.

May 23, 2022 nung Tripura Chief Minister-i Union Minister of Railways dang iba tebilemtsü khuret lemsatepogo ta Chowdhury-isa ashi.

"North Eastern Frontier Railways ajanga Chandranathpur (Assam) nungi Agartala tashi double track yanglutsü atema Final Location Survey (FLS) agiba onok dang shiogo. Agartala-Sabroom rail line ya tanga North East state tem aser Bangladesh den

shishilembatsü aser senzusenbongsü atema kanga tongtipang lir. Anungji Ministry dang Agartala-Sabroom railway project atema temulung agütsütsü ayongzüker" ta paisa shidi nung shia lir.

"Ministry nung bangdak ketdangsürtemi Agartala-Sabroom rail line Final Location Survey (FLS) agitsü aser double line rail track yanglutsü ayongzüker. Nai yariba ajanga Tripura nungeri terenlok atema alizüng ayubatem atongsü aser nüngdaktem peritsü" ta Minister Chowdhury-isa shidi nung shia lir.

Meghalaya sorkari SSA non-teaching staff itasen 25% tutsür

Shillong, July 31, 2024 (Agencies): Meghalaya sorkari Samagra Shiksha Abhiyan (SSA) nung non-teaching staff itasen 25% tutsüba metetdaksüogo.

Iba ya taküm April 1 nungi asütsü aser non-teaching staff 1200 shi dak kongshitsü ta Meghalaya education department nung special officer in charge-i Samagra Shiksha (SEMAM) state project director aser school education

and literacy director dangi shidi ka zülü.

Iba shidi ajanga Meghalaya sorkari state, district aser block levels ajak nung office staff itasen tutsütsü mulunga agizükba jangjatsür.

"Sorkari Samagra Shiksha (Non-Academic) itasen 25% atutsü mulunga agizükba osang metetdaksür. Iba ya financial year 2024-2025 (i.e. April 1, 2024) nungi asütsü aser state, district, and block MIS, DEO

aser accountant ajak adener, Finance (EA) Department-i July 18, 2024 shidi ka züluba nung ajemdaker mulunga agizüker" ta special officer in charge-i züluba shidi nung shia lir.

All Meghalaya SSA Non-Teaching Staffs Association (AMSSANTSA)-i mapang telatet makai parnok itasen tujang ta takhangba agüja lungkak aita aruba mapang ka iba osang metetdaksüogo.

GOVERNMENT OF NAGALAND DIRECTORATE OF SOCIAL WELFARE NAGALAND::KOHIMA NO.SW/PwD/DBT-2022/ Dated Kohima, the 31st July 2024 NOTIFICATION This is for information that online application of Scholarship for Persons with Disabilities (State Scheme) from Class I to Class VIII for the academic session 2024 will be open from 1st August 2024 for fresh applicants and renewal in the Common Scholarship Portal of Nagaland. Eligibility Criteria and guidelines of the Scheme are available in the website https://scholarship.nagaland.gov.in Last date for submission of application will be 30th November 2024. Sd/- TOSHELI ZHIMOMI Director.

Myanmar military sorkari emergency ano ita trok atsülangtsüogo

Yangon, Chiteni/July 31 (Agencies): Myanmar nung military sorkari state of emergency ano ita trok atsülangtsüogo. Linük nung tensa mazüokteti aliba mapang ka nung tang parnoki iba jenjang ya agiogo.

Sorkar anemertemi kiralongrar ama jenjang agir ta shia Bodhbarnü National Defence aser Security Council züngsemtem ajaki state of emergency maneni benoktsü atema mulunga agizüka liasü, ta state broadcaster MRTV-i ashi.

Army tekolakba aser Acting tir Min Aung Hlaing-i, 2025 küm election agitsü atema renemshitsü asoshi emergency atsülangtsü benoka liasü, ta broadcaster-i ashiba den nütsüngyongsük züngdangtsü atema election menorang agitsü nüngdaka aküm, ta shisem.

Taoba hopta Myanmar tir mapa Min Aung Hlaing nem

belenzüksüogo, kechiyong acting tir Myint Swe, temang anepalutsü atema soti agia liasü.

Min Aung Hlaing-i, multiparty election ka agitsü ta aiben tenangzükba agüja arudar aser June ita-a election 2025 küm agitsü ta shiogo.

Ken o asadangertemi ashiba agi, iba election ya ochishia mesüra sadem sadema magitetsü.

2021 küm February ita military-i sroar atsüngba sülen Myanmar tang tashi mesüngjemteti lir. 2020 küm election koba Aung San Suu Kyi-i aniba National League for Democracy (NLD) party-i koka liasü, iba election inyakyim nung ochi mashi inyakyim aika sendaka lir ta shia military-i sorkar atsüng.

Iba sülen military-i linük küm ka atema emergency nung toktsü aser iba sülen aiben atsülangoggo, kechiyong parnok

telungpur telok balala aser pro-democracy People's Defence Forces den raratepba mapang ka lir.

Military-i 2008 küm yangluba constitution koba tang tashi benshidar, iba kübok state of emergency aginba sülen ita trok tsüngda election agitsüla ta shia lir.

Ajisüaka ita ishika tsüngda military sorkar telungpurtem den raratepba mapang tesem aika nung tamakok nguogo.

Taoba hopta Myanmar National Democratic Alliance Army (MNDA) ashiba agi parnoki Lashio jila atsüngoggo, koba China-i aoba highway tongtibang ka nung lir aser jila nung military indang northeastern command amenoka lir. Ajisüaka iba osang ya tai ta sorkari shiogo.

Mepetmesü tenzükba sülen tang tashi nung nisung 5,400 dak tema süogo aser military-i nisung 27,000 shi puogo.

Taoba PM Khan-i military den sensaksemtsü benok



Islamabad, Chiteni/July 31 (Agencies): Tepuokdak yua aliba taoba Pakistan Ato Kilonser Imran Khan-i, military den sensaksemtsü asoshi par party renema lir aser sensaksem atema lenir ka shimogo, ta ashi. Ajisüaka sensaksem ya takhangba kar dena-ang agitsü, ta pai shiogo.

"Military ketdangsurtemi sensaksem asoshi lenir kar shimra onoki takhangba kar agütsür sensaksemtsü, ta Khan indang official X page ajanga Bodhbarnü metetdaksü.

Khan-i ashiba agi, sensaksemtsü atema takhangba rongnung kaji ochishia

merekmerekka election agitsüba aser tanabubaji pa pusemertem anema ken o taila benoka aliba agintsüba lir.

Sensaksem asoshi pai Mahmood Khan Achakzai shimogo, shiba yimden yimsüsüba nung pa den kanga junga sendaktepa aliba nisung ka aser party tilaka indang lenir lir.

Army shirnoki Pakistan nüjiso ngur küm 76 liyonga aruba nung tesadang shi yimsüsüa liasü, parnoki tang tashi nung telangzüba agüja mali. Army-isa parnoki yimden yimsüsüba nung kecha shilem magir ta shia arudar.

Army den sensaksemtsü ayongzükba atema Ato Kilonser Shehbaz Sharif-i aniba sorkari Khan aitsüogo, aser pa dang taoba mapang army anema inyakbang atema tatokang meshia, ta shiogo, ta local media sangdong balala ajanga metetdaksü.

"Pasasa sangdongba revolutionary, shibai tatok memeshitsü ta shia aruogo, pai tang armed forces dang pa den sensaksemtsü atema mepeshir," ta Pakistan Muslim League-Nawaz (PML-N) party nungi Marriyum Aurangzeb-i ashi.

Federal Information Minister Attaullah Tarar-i ashiba agi, Khan-i army den sensaksemtsü atema benokba ya linük anema lir aser pa indang menenmechi inyakyim nung state institutions anisemtsü merangba ka lir.

Khan taoba küm August ita nungi tepuokdak yua lir aser February ita national election magi tsüngda ano ken o kar nung aitsüogo. Pa tang ken o aika atema raraba mapang ka lir.

Khan aser pai aniba Pakistan Tehreek-e-Insaf (PTI) party-i ashiba agi, pa anema benokba ken o tem ya pa nem tashi tanaben magütsütsü asoshi yimden yimsüsüba dak sendaka lir.

Iran nung Hamas yimden lenir Ismail Haniyeh tepset

Tehran, Chiteni/July 31 (Agencies): Hamas indang political chief Ismail Haniyeh ya Iran yimtiba Tehran nung tepsetogo, ta Gaza nung yimsü asüba teloki sangdong ka nung ashi aser pa asüba atema Israel tenüng asen.

Parnok aliba ki amakba sülen Haniyeh aser pa indang bodyguard ka asü, aser Haniyeh ya Mongulbarnü Iran Tir Masoud Pezeshkian indang inauguration sentong nung adener Tehran nung arua liasü, ta ashi.

"Asen Palestine nübur, Arab aser Islamic linüktem aser alima nung talenba maliba nüburtem ajunga den Islamic Resistance Movement Hamas mangyim lemsateper: adianu, lenir, linük asoshi takum bendanga agütsür Mujahid Ismail Haniyeh, movement tekolakba, Zionist temi Tehran nung par kidang tepset," ta Hamas-i Bodhbarnü ashi.

Iran indang Islamic Revolutionary Guard Corps (IRGC)-ia Haniyeh asüba sangdonga liasü.

"Tanep Tehran nung Ismail Haniyeh'er ki amakdang pa den pa indang bodyguard ka takum sama. Iba tatalokba bushisüngdangtar aser yakta osang agütsütsü," ta IRGC ajanga sangdong ka nung ashi.

Osangtem ajanga ashiba agi, Bodhbarnep 2:00 ako meta Tehran north tsütsü mitkar inyaka alir tejentem asoshi ki balaka yuja aliba nung "airborne guided projectile" agi amakdang Hamas lenir ya tepset.

Haniyeh asüba atema Israel ola madoker, aser Ato Kilonser

Benjamin Netanyahu indang office ajanga cabinet minister tem dang ola madoktsü totuyuba agütsüogo ta osangtem ajanga ashir. Ajisüaka far-right Heritage Minister Amichai Eliyahu-ibo Hamas lenir asüba ya social media sapang X nung benjonga liasü.

Tepsetba ajanga alima tera tajungba akumer, ta pai Hebrew oshi nung zülü.

October 7 nü Hamas teloki Israel maka nisung 1,200 tepseter 200 dak tali pua bener aoba sülen Israel-i Hamas samatsütsü nangzüka Gaza nung rara tenzük.

Iba rara nung Palestine nunger nisung 39,400 shi tepsetogo aser nisung 90,996 yirur lir.

Haniyeh ya 2019 küm Gaza Strip yutsü aser Qatar nung oa alir. Gaza nung Hamas lenir tekolakba ya Yahya Sinwar alitsü.

Bodhbarnü Israel sorkar indang press office ajanga social media nung Haniyeh indang noksa ka nung "eliminated" ta zülur post asü saka mapang tatsüka lir indok.

Pa asüba ajanga Gaza nung ceasefire bener arutsü merangba nung menutsü, kechiaser Qatar, US aser Egypt tetsüngtai ia ken o jembiba nung pa ya interlocutor tejangja liasü.

Iraq, Turkey, Russia aser Qatar densema linük aikati Haniyeh tepsetba aitsüogo. US Secretary of State Antony Blinken-i Haniyeh tepsetba ya memetetba ka masü mesüra shilem agia mali, ta shiogo.

(Maneni tapak 8 nung...)

TENÜNGSANG AGÜTSÜR

Ungma Yimlang Pongen kidong nungi Oboula Imertetba semchir wabong lmtinungsang Pongener aser kinungtsü Watsü lmlitula Longkümtsür Kanga dang ajemalu aser terenem, meranga inyaker kibong nungi tena jala Kongro Arennungla Pongentsür-i Senior Divisional Accountant Department of Treasuries and Accounts menden ajangzükteba atema Oboula Imertetba Semchir kidong aser lllangtsür-i ne dang Kanga pelar aser na ajanga Tematiba Tulusang Tsüngrem nem sentsüwangshi konang Tetushi agütsür.

Tanü alima rongsen benbuba putu ka nung na temaba menden nungi rongsen küdangsüa nübur tenzükdang alima nung samatsüba rongsen dang nungi kodanga mesamatsüba Kotaker rongsen rezunger jenti lidakjang ni ta tepela tulu lemsateper. Tsüngrem dang Sentsüwangshi.

Sd/- Imkongnungla Pongentsür Ungma

Sd/- Ekumsangla Pongentsür Ungma

WORLD Breast-feeding WEEK 2024

THEME "CLOSING THE GAP: BREASTFEEDING SUPPORT FOR ALL"

01 TO 07 AUG 2024

- KINÜ TANUR KUMZÜKA AYÜTSÜ ASER IMMUNITY YANGERDAKTSÜTSÜ ATEMA SOR GHONDA TESADANG TSÜNGTA NUNGI MAMA YONGDAKJANG. 1/2 HR
- SOR ITATROK MAMAKISÜNG YONGDAKTSÜTSÜ TONGTIPANG. 06 MONTHS
- TETSÜ KA MAMA YONGDAKTSÜTSÜ MAPANG NÜNGDAKBA NUNG AJAKI YARIDANG MAMA YONGDAKTSÜTSÜ TEZÜPABAAKUMER.
- MAPA INYAKBA TESEM NUNG MAMA YONGDAKTSÜTSÜ YIMYA KUMDAKJA TETSÜ ASER TANUR NEM MAPANG AGÜJANG.
- MAMA DEN FOOD SUPPLEMENT KÜM ANA TASHI AGÜJANG. 02 YEARS

FOLLOW US @nhmngaland @NagalandNhm FOR MORE INFORMATION CONTACT THE Chief Medical Officer's Office, Nearest Health Center.

